

永春縣志卷十八上

列傳^上

序曰閩地早入版圖惟拓殖稍後永春視他縣尤後焉迺列場置戍曾不百年而盛陳文學林留武節並抗衡上國聲施到今造物之生材豈擇地哉或以永地山川嵯峩泮渌而堂奧陬隘故通籍之後流寓十九此一孔之見也人能弘道尙毋以蕞爾自域哉今舉其卓犖可紀者參稽史籍繫之此篇其先後一以時代爲次其有橋梓濟美棣萼交輝者揆之四科無大徑廷則從其所重綴而紀之不別出也舊志別勳爵於名臣復異仕蹟以宦業微闡之旨未省所寄今統稱列傳志例也亦史法也

永春縣志

卷十八上

列傳上

一

唐至宋

盛均字之才迎福里人大中十一年第進士聰穎超邁文名震一時舍人皇甫煥辯博自雄每賓客及門置酒延坐廣引發難屈者多不終席自引去惟均酬答如響時謂勅敵嘗病白氏六帖疎略乃囊括經史貫穿百家廣之爲十二帖爲文多擿棄常解規切時弊有人旱仲尼不歷聘真龍對送建安郡守諸篇宋大中祥符間姚鉉選唐文粹錄之今行于世均仕終昭州刺史里居時築別業烏石山下今毗藍巖卽其地也二世孫烈嘗任會稽守亦以文學顯相傳威應侯廟碑其筆也

林仁肇儒林里人貌雄偉有機謀膂力絕人嘗文身作虎形人

謂之林虎子初事閩爲裨將閩亡未有所附會周師攻淮南南
唐主李景遣潘承祐入閩募勇士承祐以仁肇名上拔爲將率
偏師援壽州破濠州水柵以功擢淮南屯營應援使時周人徙
正陽浮橋於下蔡仁肇率敢死士千人水陸並進復以舟實薪
芻乘風舉火焚橋周駙馬都尉張永德率衆來爭會風回火不
得施勢少郤永德鼓譟乘之南軍遂敗仁肇獨騎殿後永德故
猿臂善射矢至仁肇所輒爲格去永德大駭曰敵有人未可逼
也舍之而還及景割地請平授仁肇浙西鎮海軍節度使移鎮
武昌宋受周禪後淮南諸郡所守各不過千人仁肇密說後主
煜曰宋淮南戍兵單弱而連年出兵滅西蜀平荆湖今又取嶺

永春縣志

卷十八上

列傳上

二

表往還數千里師旅罷敝此在兵家爲有可乘之勢請假臣兵
數萬自壽春北渡徑據正陽因其思舊之民累年之粟復取淮
甸易如轉丸彼縱來援吾形勢已固必不得志兵起之日仍馳
聞北朝以臣舉兵外叛爲辭事成國家饗其利不成則族誅臣
家以明陛下無貳勝於坐而待亡也煜驚曰無妄言宗社危矣
未幾改洪州節度使留守南都仁肇起家行伍雖任將帥恆與
士卒均食同服以故多得衆心宋太祖欲平江南將士素憚仁
肇威名未卽遣乃密賂仁肇侍者竊取仁肇畫像懸之別室時
後主弟韓王從善質汴太祖引從善觀之問曰卿識此人否從
善曰臣不識然有類臣江南林仁肇太祖曰是也仁肇欲歸朝

先表進此爲信朕行遣迎之矣從善駭不省其詐亟使人間行歸白其事後主惑之時皇甫繼勳朱全贇方掌兵柄素與仁肇不協因搆仁肇求援宋朝欲自王江西煜先入繼勳等言又惑從善間遂潛使酖之初仁肇見知於陳喬喬嘗曰使仁肇將外喬居中掌機務國土雖蹙未易圖也及仁肇死喬歎曰事勢若此而殺忠臣吾不知所稅駕矣竟不能白其誣仁肇兄仁翰事閩主王曦爲南廊承旨連重遇弒曦立朱文進是時曦兄富沙王延政已據建州改國號殷仁翰謂其徒曰吾曹世事王氏今受制賊臣富沙王至何面目見之率其徒三十人被甲趣重遇第重遇方嚴兵自衛三十人者望之稍稍遁去仁翰執槊直前

永春縣志

卷十八上

列傳上

三

刺之斷其首以示衆曰富沙王且至汝輩族矣今重遇已死何不亟取文進以贖罪衆踴躍從事遂誅文進迎延政將吳成義入福州已而仁翰至建州延政賞賜頗薄然仁翰終未嘗自言

其功

舊志仁肇傳甚略省志本南唐書極詳核錄之
省志稱建陽人流萬也仁翰舊志無從省志補

留從効昭善里人父彥雄

據徐鉉集冊文

天祐末生從効於城東之留

灣從効幼而孤事母兄以孝悌聞頗知書好兵法有善術者稱其龍睛虎鼻異日大貴壯爲泉州散指揮朱文進之弒閩主曦也以其黨黃紹頗爲泉州刺史從効密圖興復告同列王忠順董思安及所親蘇光誨曰朱文進屠滅王氏遣腹心分據諸州吾等世受王氏恩遇而交臂事賊一旦富沙王克福州吾屬死

有餘愧三人以爲然從効乃令各約軍中所善夜飲已家得陳洪進等五十二人從効給之曰富沙王已平福州密旨令吾屬誅紹頗衆皆踴躍操白梃踰垣而入執紹頗斬之從効持州印詣延政從子繼勳第請主軍府而已與忠順思安皆自署平賊統軍使函紹頗首遣洪進齎建州殷主延政大喜以繼勳爲侍中泉州刺史從効及忠順思安並爲都指揮使晉開運二年南唐兵陷建州繼勳以泉州降南唐主李景以光州人李宏義爲威武軍節度使明年繼勳致書修好於宏義宏義以泉州故隸威武軍怒繼勳抗禮遣弟宏通將兵萬人伐之從効謂繼勳曰李宏通兵勢甚盛士卒以使君賞罰不當莫肯力戰使君宜

永春縣志

卷十八上

列傳上

四

避位自省乃廢繼勳歸私第代領軍府事稱泉漳二州留後勒兵擊宏通敗之表聞於景景卽召繼勳歸金陵以從効爲泉州刺史遣將將兵戍之會漳州將林贊堯作亂從効與劍州刺史陳誨合兵逐之令思安權知漳州景改漳州爲南州卽以思安爲刺史頃之從効謂戍將曰泉州與福州分屬唐吳越世爲仇敵南接嶺表瘴癘之鄉地險土瘠比年軍旅屢興農桑廢業冬徵夏斂僅能自贍豈勞大軍久戍於此置酒餞之戍將不得引兵歸景新敗自知無以制從効乃加從効檢校太傅以安之漢乾祐二年從効兄南州副使從願酖殺董思安而代之從効自此兼有漳泉景因升泉州爲清源軍拜從効節度泉南觀察使

尋兼中書令加侍中封鄂國公周廣順元年景晉封從効晉江
王從効出自寒微知人疾苦專以勤儉養民爲務衆所不便者
皆除去之常衣布素置公服於中門之側出視事乃服之每曰
我素貧賤不可忘本也由是部內安治每歲取進士明經謂之
秋堂世宗南征李景以兵十萬保紫金山從効累表景言頓兵
老師形勢非便景不聽果敗江北諸郡盡失景稱臣於周從効
遣牙將蔡仲贊等衣商人服置絹表革帶中由鄂路送款內附
顯德六年復遣使入貢並請置奏進院於京直隸中朝世宗以
從効久附江南不許但降詔慰勉之宋受禪從効稱藩奉貢太
祖厚賜撫之會景遷都洪州從効疑討已遣從子紹錡厚幣獻

永春縣志

卷十八上

列傳上

五

景建隆三年疽發背卒年五十有七

舊志作五十
今從省志

後主煜詔贈

太尉靈州大都督謚曰恭從効無子以兄子紹錡紹錡爲後紹

錡質唐留宿衛

據神
道碑

衆推紹錡典留務月餘陳洪進執紹錡送

江南誣以謀叛立副使張漢思旋廢之而自立厚斂修貢賄賂
公行漳泉之民病甚因是益思從効真宗大中祥符七年從効
孫丕式詣闕上從効所受太祖制書詔授三班借職從効有再
從弟從諲淳化中爲泗州長史有清節太宗聞其名召赴闕特
遷揚州觀察使從効六世孫正歷相孝宗光宗寧宗自有傳

柯述字仲常和平里人後徙居儒林里父慶文第進士終屯田
員外郎述與弟述迪嘗贄文見蔡襄襄異之未幾相繼登第述

初爲泉州教授登第後尉贛嘗獲劫盜罪皆重辟述閔之捐贓以就次賞知歸安修水田蓄洩之利民皆便之移知襄邑盜悉奔他境神宗聞其政聲召對便殿盜意述代去復竊發下吏治得所以乘間之狀上益嘉歎書其姓名於屏擢知懷州元祐元符間兩知福州時社稷壇在烏石山陰述闢而新之

舊志無從省志補

福州舊無貢院大比則試士於廟學釋奠反移他所述擇州之東南公廡及隙地構屋百二十區士人德之祠於學歷福建提刑湖南轉運使奉祠終朝議大夫直龍圖閣述貫通百家諸史尤粹於易著否泰十有八卦以明進退君子小人之義自名一家嘗倅漳多惠政有雙鵲棲於廳事迨去鵲亦隨之若送行然

永春縣志

卷十八上

列傳上

六

蘇軾作紀事詩晁補之題其後比諸信及豚魚云子暘仕至福建漕使從孫知彰

參省志

黃維之名偉以字行更字叔張始安里人弱冠從兄巽之入太學屢試占首與黃槐齊名人稱二黃紹興二十七年除太學學錄遷國子監主簿孝宗卽位轉對進所撰太祖政要論愛名器勵廉恥因及銓試冒名代筆事下館學集議維之奮筆獨立議狀可否適宜孝宗深然之其後立任子覆試法實自維之發之時孝宗銳意恢復獻議者乞立武賢良科維之奏言賢良求文武全才不宜復立科事遂寢除大理寺丞會卿少欲奏獄空維之以所隸有獄未竟不敢書名遂削去維之名銜以聞維之白

執政有官守者不得其職則去力求補外差知邵武軍陞辭賜對論選用大臣當如王素對仁宗宦官宮妾不識名者可充其選又論乾道新書不當刪減內侍不得干預朝政孝宗面加褒諭維之自爲小官恥於干進後綰郡章持使節敷歷中外直道而行略無阿曲歷官江西提學所拔多單寒士有挾貴而來者悉屏不舉晚號竹坡居士養閒十年手不釋卷嘗與建陽朱熹論學後進以鄉先生事之維之亦喜接引出其門者皆有所成就疾革之夕猶與諸生講論至夜分卒年七十有九子以寧以簡以大猶子以翼皆知名以寧字宗一弱冠遊太學文聲藉甚慶元元年上半年舍釋褐教授惠州旋擢太學學錄差充淮西轉運

永春縣志

卷十八上

列傳上

七

司幕轉運使雅敬重之會淮甸大饑人相食部使者檄以寧循行賑貸區畫有方多所全活改秩通判建寧府守史彌堅者時相彌遠弟也喜事尙威關決有所不當以寧引誼力爭彌堅積不能平喉臺臣劾罷之比去父老遮留者數千人歸里杜門奉祠廷接後學講論忘倦守令咸樂咨以政以寧毫不及私端平初理宗親政凡忤彌遠者皆敘復召用而以寧已卒弟以簡知永福縣以大知循州

參省志
刪補

以翼自有傳

朱子集中有答黃叔張書及酬和詩數篇

留正字仲至從劾六世孫也居晉江少游惠州歸善徐敦實妻以女因應惠州舉紹興三十年第進士調南恩州陽江縣尉用清海軍節度判官龔茂良薦赴都宰相虞允文奇之薦於朝得

賜對正言本朝右文而略武備承平日久邊防廢弛至敵人長驅而不能支今當改轍使文武並用孝宗嘉歎錄劄中要語下三省施行除知循州陞辭言士大夫名節不立國家緩急無所倚仗靖康中金人犯闕効忠死義者少因亂謀利者多今欲恢復當崇名節孝宗益喜之明日諭輔臣曰留正奏事議論耿耿可與職事官留爲軍器監主簿遷考功郎官太常議謚葉義問恭簡正覆議駁曰義問將兵出疆不知敵人情僞督視寡謀幾至敗事不得有美諡時論躓之擢起居舍人正言記注進御非設官本意乞自今免奏御從之光宗嘗自東宮朝顧見正謂左右曰端整如此其人可知乃請於孝宗兼太子左諭德尋權吏

永春縣志

卷十八上

列傳上

八

部尙書疏奏用人莫先論相陛下志在恢復而輔臣不能任襄贊望精選人材與圖大計忤時相意以顯謨閣直學士出知紹興府歷知隆興府會四川闕帥孝宗問孰可者宰相王淮以正對加龍圖閣直學士爲四川制置使兼知成都府侍御史王洽輪對畢孝宗詢近來進擬合公道否洽曰成都除留正甚當臣敢爲朝廷得人賀正至鎮以簡素化民薦興元府錄事黃裳等五人於朝後皆知名青羌奴兒結據安靜砦爲邊害者十餘年正密授諸將方略擒奴兒結誅之盡俘其黨事平進敷文閣學士以病請代詔赴行在歸裝僅書數麓淳熙十六年除端明殿學士明年參知政事兼同知樞密院事十八年正月遷通奉大

夫拜右丞相一日奏事畢皇太子參決侍立孝宗顧謂太子曰留正純誠可託二月光宗受禪姜特立以春坊舊人擢知門事會副參闕人特立謁正曰上欲遷丞相左揆就二尙書中葉翥張杓擇一人執政孰可者明日正列其招權預政狀光宗怒詔特立奪職提舉興國宮孝宗聞之曰真宰相也紹熙元年轉左丞相正謹法度惜名器毫髮不可干以私請召趙汝愚爲吏部尙書用黃裳爲皇子嘉王翊善時稱得人嘉王感疾正言陛下只有一子隔宮牆外非便當早正元良之位入居東宮以定國本不報遂檢漢文帝紀及本朝真宗立仁宗典故并節呂誨張方平兩疏要語繳上明年冬光宗不豫外議洵洵正與同列間

永春縣志

卷十八上

列傳上

九

至福寧殿奏事處分得宜人情以安進封申國公光宗疾寢平乞歸政不許壽皇聖政錄成加正少保封衛國公李端友以椒房親手詔除郎正繳還不納復執奏曰昔館陶公主爲子求郎明帝不許今端友依憑內援恐累聖德姜特立除浙東副總管尋召赴行在正引唐憲宗召吐突承璀事乞罷相不許正因入對復言臣與特立勢難兩立光宗曰成命已頒朕無反汗正待罪六和塔奏言陛下每事堅執不顧是非臣恐自此以往言路塞矣言路塞則萬機壞非所以愛宗社也遂繳進前後錫賚及誥勅待罪范村乞歸田里不許值壽聖皇太后將以冬至上尊號冊寶正請隨班上壽於是命特立還故官而以正爲禮儀

使攝太傅遣左司徐誼諭旨正始赴都堂視事是行也凡待罪一百四十日冊寶禮成拜少傅封魯國公正力辭五年五月孝宗疾革正數請車駕過宮侍疾不納既而正與同僚進諫光宗拂衣起正引裾隨帝至福寧殿內侍闔門乃泣而出六月戊戌孝宗崩光宗託疾不出壬寅將成服正等奏曰臣等連日造南內請對不獲累上疏不報今將率百官恭請若皇帝不出乞太皇太后降旨依唐肅宗故事羣臣發喪太極殿皇帝以有疾故成服禁中然喪不可無主祝文稱孝子嗣皇帝宰臣不敢代行太皇太后壽皇之母也請攝行祭奠禮太后許之丁未正待對和寧門不報遂上劄子言臣伏見近日中外人情不安思所以

永春縣志

卷十八上

列傳上

十

鎮壓之計莫先於重國本皇子嘉王仁孝夙成宜早正儲位以安人心又不報越六日再請許之甲寅正同執政擬旨以進乞付學士院降詔是夕御批付正曰朕歷事歲久念欲退閒連乞奏事不獲戊午又批出十六字正大懼

省志據慶元黨禁記補

臨朝佯仆

於庭引疾告老初正議光宗未克主喪宜端默三年立皇太子權監國事俟終喪復辟如上皇有倦勤之意而後皇太子可卽帝位既而趙汝愚謀以內禪請於壽聖皇太后正謂建儲詔未下而遽及此情禮未安兩宮父子之間他日必有難處者與汝愚論不合七月辛丑旦遂以肩輿遁去甲子寧宗卽位尊光宗爲太上皇帝以正爲大行攢宮總護使正入謝復出城趙汝愚

請召還正長百僚壽聖皇太后以爲然命寧宗親札遣使宣押正至仍爲左丞相首請車駕一出安都人心進少傅屢辭疏言陛下勉徇羣情以登大寶當遇事從簡示天下以不得已之意實非頒爵之時遂不拜韓侂胄寢謀預政數詣都堂正遣省吏諭之曰此非知閣日往來之地侂胄怒而退孝宗靈駕將發引汝愚議攢宮非永制欲改卜山陵正謂國步多艱經費百出改卜非宜汝愚本倚正共事與正議雖不合然無憾正意也侂胄知寧宗頗厭正因藉汝愚議從中間之八月除正觀文殿大學士出判建康府尋落職罷歸慶元元年六月詔宣取上皇付正御劄頒藏史館復觀文殿大學士充醴泉觀使初正當國多拔

永春縣志

卷十八上

列傳上

十一

善類尤重朱熹有重慶守劉德秀者未爲正所知入朝謁正客著作佐郎范仲輔請爲之地正薄其爲人曰此人若留之班行朝廷恐難安靜不得已除大理寺丞主簿德秀憾之至是以附侂胄擢諫議大夫知侂胄惡熹因藉熹爲質的因以陷正論劾正四大罪首論其招引僞學以危社稷僞學之稱自此始正遂褫職三年六月復爲侂胄黨張釜所論責授中大夫光祿卿分司西京邵州居住明年量移南劍州六年上章納祿詔復原官職致仕以御史林采言依舊光祿大夫致仕尋復觀文殿大學士金紫光祿大夫嘉泰元年進封魏國公二年復少保觀文殿大學士開禧二年四月正聞有邊事歎曰侂胄何人誤國至此

自是寢食俱廢七月卒年七十有八贈太師寶慶三年追謚忠
宣子恭丙籟碩省志案歷代名臣奏議嘉定十二年衛涇薦狀云朝散大夫權發遣邵州軍州事留筠存心簡靜臨事寬明雖出相門實通吏道到官以來能於整辦之中不失拊循之實此留筠當亦正子孫而諸志俱失載附錄備考

恭字伯禮以蔭補官歷通判廣州秩滿民疏其惠愛二十事
乞留之擢知南康軍爲治俱法朱熹舊政嘉定初提舉浙西常
平值大饑悉力賑恤全活三十六萬六千餘人遷浙西提刑尋
爲浙東安撫使兼知紹興府蠲祖省役罷遊宴絕餽遺杜請謁
人稱其廉移帥廣東徭寇竊發恭捕得其豪酋降之由是四十
四峒悉平後以直徽閣奉祠起知建寧府卒贈祕閣修撰子元
剛 丙字南仲歷知宜梅潮三州乞禁海賈勿通閣婆以防洩

永春縣志

卷十八上

列傳上

十二

鏹移知常德府遷知撫州專務鎮靜事不趣迫而辦百姓安之
參政衛涇薦於朝稱丙居心重厚爲政和平雖生相門諳練民
事此與名臣奏議所載大略相同或筠卽丙之異名歟未及擢用而卒子元治主管南外

睦宗院元均通判惠州 籟字端父爲司農寺丞使金察其勢
必亡歸陳備邊五策除度支郎官提點湖南刑獄尋移江西改
知廣州請鬻小鈔以弭鹽寇端平中除直龍圖閣奉祠卒籟端
厚有度在正諸子中尤賢嘗掇遺業三之一建義莊贍宗族之
貧者子元英元圭元崇元崇有俊才通判興化軍蚤卒 碩字
季膺歷南劍州通判遷知南恩州奏言廣南州郡兵弱乞刺填
軍額以備不虞改知岳州講荒政閱租稅民便之入爲大理寺

丞請立武舉解額試於諸路帥府中則試兵部事雖不行論者是之終知建昌軍子元長元亮元長歷知新連全三州召爲太府寺丞出知撫州改知汀州元亮淳熙間爲古田縣令有惠政勸義冢置貢士莊民立祠祀之 元剛字茂潛博學強記爲文奇峭開禧元年試博學宏詞科與浦城真德秀同應選考官李大異批德秀卷云宏而不博批元剛卷云博而不宏寧宗喜其文命俱置異等授元剛國子監學錄嘉定初累遷直學士院嘗言今日有貧國貧民而無貧士大夫聞者以爲至言遷權起居舍人奏言國朝左右史立御座後今乃躲殿東乞復侍立修明舊制以內艱去服闋起知温州勤恤民隱發奸摘伏人推精敏

永春縣志

卷十八上

列傳上

十三

永嘉劉氏掩據晉王羲之墨池且百年劉本豪族莫敢斥言者

元剛徑判歸於官

四朝聞見錄云嘗得方嚴王公簡復士人周甫書云茂潛永嘉之政如干將莫邪新發

於剛故不可以得元剛之爲人矣

加直寶文閣移知贛州爲

言者論劾詔與宮觀罷歸元剛早負盛名自擬大用使酒任氣既剛後鬱鬱不適築圃北山自號雲麓子德秀初甚與之契中年對客語及則愀然不悅蓋嫌其矜才傲物不能蓄德以待時也 元英嘉定十年進士寶慶初歷遷監察御史疏請下吏部應銓量令官長貳從容延接訪問民事其疾病癯老者準指揮施行如貪酷累被按劾者別注降等差遣以稱量能授官之意諸路州軍僚屬私役禁軍及閩廣州縣於常賦外敷鹽擾民乞

申嚴法禁皆從之除權工部侍郎出知潮州遷寶章閣待制知漳州 元圭字粹中以蔭授承奉郎父鑄使金元圭時典牋奏禮悉所裁定主管南外睦宗院改知建安縣獄有麗重辟者久不決一閱卽得其情均徭省訟治績爲諸縣最卒於官

舊志藝文類錄

朱子與留丞相書一篇今按見行朱子文集卷二十與正書共十九通繁不勝錄省之

陳樸字端行昇平里人知柔姪

知柔號休齋見儒林傳

乾道五年進士爲

江西運司主管文字以薦入提轄左藏大理寺正知漳州節浮費五萬爲民代輸身丁稅提舉湖北常平倉召除倉部以左司郎官接伴金使舟行大江中流風暴作金使駭汗樸笑傲自若曰此天之所以限南北者守疆息民順天則天福之江有神不

永春縣志

卷十八上

列傳上

十四

可欺也金使悚然擢太常卿除知廣州兼廣東安撫革除弊例帑藏羨溢受代儲錢數十萬上於朝子亞卿終知廉州直卿知英德府弟機模 模字中行才氣高邁貫穿經史開門授徒戶屢常滿登慶元二年進士中教官科宰執以學行薦除國子正開禧初召試館職時方議開邊模對策有王恢首謀之戮不足以贖僵尸百萬之冤等語意特警切參政李璧讀之歎曰真館職也除祕書省正字校書郎通判鎮江府平鹽鈔法公私俱便改知梅州多惠政民爲立祠改汀州民以綵幟迎題其上曰歡迎鄞水新賢守知是梅陽舊使君居五月卒子晉接紹定壬辰進士仕至國子司業宗正卿機自有傳

莊夏字子禮桃源里人幼時父母避賊棄之草間虎乳之稍長目炯炯有夜光父卒從兄晦學弱冠通禮經郡博士張叔椿奇之勉入太學登淳熙八年進士知寧國縣歷知贛州興國縣專務教化興庠序清賦稅剔蠹弊息爭訟剖疑獄或下戶逋欠給錢代輸所至有聲慶元六年大旱詔中外直言闕失夏上封事曰君者陽也臣者陰也今威福下移此陰勝也積陰之極陽氣散亂而不收其弊爲火災爲旱蝗願陛下體陽剛之德使後宮戚里內省黃門思不出位此抑陰助陽之術也召爲太常博士疏言比年分藩持節詔墨未乾而改除坐席未溫而易地一人而歲三易節一歲而郡四易守民力何由而裕尋以著作佐郎

永春縣志

卷十八上

列傳上

十五

提舉江東常平倉賑給流民多所全活除轉運判官踰年入爲尙書郎遷軍器監太府少卿出知漳州奏罷高荒俵寄產錢又請屯兵大池故寨增小澳舊志作溪南嶺二寨控扼汀潮捐貲造橋於柳營江以避覆舟之險舊志作柳洋江尋以宗正少卿召舉洪咨夔自代不允至京兼國史東宮官直學士院兼太子侍讀時河北流民來歸夏言荆襄兩淮多不耕之田計口授地貸以屋廬牛具吾乘其始至可以得其欲彼幸其不死可以忘其勞兵民可合屯田可成此萬世一時也試中書舍人有除授非人者輒封還嘗奏戰守不成規模未定則和好之說得以乘間而入今日之患莫大於兵冗乞行下諸路將帥令老弱自陳得以子若弟

姪若壻強壯相等者收刺之代其名糧寧宗曰兵卒子弟與召募百姓不同卿言是也除兵部侍郎仍掌內制自史彌遠當國諱言邊事廟謨秘密人莫敢議夏言西蜀潰卒宜討宜招江淮制閩宜分宜合山東忠義宜刺宜汰比年集議寢少乞詔侍從兩省臺諫自爲議狀與二三大臣類聚以聞忤彌遠意夏以所言不用累疏乞閒除寶謨閣待制奉祠進煥章閣待制歸閉戶著述自號藻齋老人嘉定十二年封永春縣開國男食邑三百戶所居在蓬萊山寧宗賜第府城始自永春移居晉江卒贈少師寧宗贊其像曰天生美質學業逍遙堅冰志操歷仕三朝忠言逆耳書史所標宗祀繁衍百世不祧其被遇如此夏遂於經

永春縣志

卷十八上

列傳上

十六

學所著有禮記解國史大事記典故備志遺文二十卷子夢說

官太常

省志缺

夢周

省志誤作閣

知建昌軍新城縣夢序改名序登嘉

定十三年進士歷太常主簿終大理寺正孫七人彌堅彌明俱第進士彌大彌邵俱知名彌邵序子字德修用蔭補承務郎監福州水口鎮擢臨安府通判討平天目山寇以功權知安吉州有惠政召除軍器監丞輪對首以進德修業爲言且謂大廷螭陛下之對禮貌親而情意疏廣廈細旃之講誦說多而推行少理宗嘉納之立朝多所論諫與弟彌大咸有聲進軍器監宋亡棄官歸田里時守臣蒲壽庚降元爲中書丞辟故臣之在泉者復其官彌邵與兄編修官彌堅弟刑部郎中彌大俱不仕

參省志補

陳一新字又之始安里人少學於陳知柔登紹熙元年進士調汀州教授慶元四年較藝漕闡時韓侂胄用事一新發策以谷永攻君而黨王氏劉蕢言直而有司不取爲問同列請易之一新毅然曰頭可斷問不可易侂胄聞之怒將罪之賴侍臣力救得免累遷國子監博士輪對極言權倖之弊被劾罷去通判婺州後知邵武軍所至郤互送簡供餽以廉平稱卒於官初言者請下轉運司索官不習僞學狀一新曰吾寧不爲考官決不書也其風節如此所著有奏劄講義及詩詞雜文藏於家

林萬字仲至

里人慶元五年省試第二登進士教授惠州

改兩浙漕司幹官擢三省掌故恬於進取以謁權要爲恥未幾

永春縣志

卷十八上

列傳上

十七

被劾罷復沿海制置司幹官改秩知宣城縣卒

顏橐字養正慕仁里人由永春徙居晉江以太學生登開禧元

年進士歷藤州教授調會昌令改廣州南海令因威濟惠寇盜

斂迹

二句舊志無從省志良吏傳補入

通判循州遷知梅州贛寇陳三總

省志作三

槍

率黨萬人逼梅城四十二日橐激勵將士分隅拒守又合蜚

船布水陣攢矢射之賊遁帥府上其功會病卒

陳景魏昇平里人知柔從孫以郊恩補信州鉛山簿歷監贛州

會昌令石城寇竊發景魏請乘機掩捕郡守然其計破賊砦禽

其酋餘黨悉平辟廣州新會丞改知潮陽縣歲輸丁銀至郡

例增耗曰錠頭錢景魏曰此小民無窮之害亟裁去及解郡守

謂不如例盡械解吏景魏曰令裁之當罪令守亟釋之尋歷提轄文思院改知惠州郡有疑獄久不決景魏讞出之重正胥魁之罪惠新經兵燹痛自撙節起學宮官廨仍以餘力葺白鶴故居合江樓及六如亭諸名勝歲大飢上言民瘵未瘳乞減惠民糴米三之一改知韶州以言者罷主雲臺觀起知英德府白帥增洽洸口戍兵以防獯寇不從未幾獯覆洽洸始如其策增兵守之開慶己未卒年七十七積階至朝散大夫洪天錫狀其行謂其少不倨老不惰病不昏化不怛信善人云

留東字純仁丞相正五世孫少嗜學博極羣書名重一時入太學國子正余學古奇之曰遠到材也景炎元年以兩登極恩賜

永春縣志

卷十八上

列傳上

十八

同進士出身授肇慶府司法參軍廉勤有聲遷從事郎清海軍節度推官性明敏遇事判決如流人不能欺然存心平恕不輕致人于法有邏卒得賂縱盜以良民充格獄數歲不決東一夕平反之辨釋數十人郡人驚歎以爲神明旁邑陳姓者作奸致富以嫌疑誣致鄰人于辟東廉得其冤釋之越舊帥李秉忠子被誣久繫外臺委東覆訊東白其枉外臺猶豫未決東曰鍛鍊文致仁者不爲惟公寬之於是同僚皆敬憚焉未幾改帶行國子監編較平海軍節度推官值宋亡杜門不出元至元間錄宋遺臣郡守重其才行表薦之授桂陽縣丞及乳源縣尹俱辭不

就舊志無從省志補
參留氏世譜行狀

永春縣志卷十八中

列傳中

明

張政原字仕衡 里人由庠生應洪武二十九年貢入國子監試高等授浙江道監察御史正色直言以骨鯁稱永樂乙酉爲彈劾註誤左遷永康縣幕秩滿陞禮部儀制司主事辛丑冬以疾辭歸老於家政原閱歷中外二十餘載恪恭盡職有古大臣風

顏隆字文盛慕仁里人初以貢入太學正統元年授江西吉安府推官廉明有威少師楊士奇之子犯法廉得之卽計執至署

永春縣志

卷十八中

列傳中

一

議刑當道交薦於朝擢河南按察司僉事流寇深入統師禦之民賴以安景泰初乞歸成化間進朝列大夫卒年八十有二黃光昇字明舉儒林里人高祖永洪武間爲永春諸生因同舍合詞訐奏教諭坐累逮至京斥爲民永時方髻年發戶部充吏因典簿書習法律尙書奇其材舉授本部主事遷員外郎出爲寧波知府以治最調湖州歲飢賑貸有方以餘閒修水利歲豐倍入復調知廣信府先後二十七年勤民勵節終始不渝致仕歸卒于家光昇幼而警敏學有原本舉嘉靖戊子鄉闈己丑第士知長興縣年僅二十有四長興故劇邑賦繁而多虛糧積逋彌甚光昇躬自綜覈定輸收彙券俾各以頃畝自實吏民莫敢

隱蔽賦爲一清召入爲刑科給事中改兵科時夏言當國凡給事有建白奉旨處分卽造內閣謝光昇念旨出朝廷奈何謝閣獨不謝言與尙書霍韜武定侯郭勛互相詆訐光昇昌言大臣宜和衷而各分町畦非所以尊朝廷定國是言銜之出爲浙江按察司僉事改參議言旣再相道出衢州人爭伏謁光昇遣持刺候導而已言益銜屬銓曹中以大計而是時徐階爲吏部侍郎獨知光昇賢持不聽遷廣東副使歷四川參政廣東按察使光昇在浙江董水利力排衆議修築海塘法盡善後人則之至今稱爲黃塘又復諸暨泌湖以蓄洩山陰會稽蕭山諸邑水在廣東職巡視海兼筦市舶廣東民多挾大舸入海與夷市間起

永春縣志

卷十八中

列傳中

二

剽掠光昇爲嚴干擱置稽驗籍下令捕海寇者予所獲財物民遂不爲盜海外諸夷以市來者故有緡算主進吏侵獵其入纔什一耳光昇更爲徵令夷稅十減六而課入反倍己獨錙銖不染後罕有能繼其廉者安南莫正中與莫浚翼爭立敗而來奔其酋范氏潘氏以兵攻欽州索正中是時俞大猷爲將光昇集舟師檄東莞新會兵密授大猷方略伏兵海島連戰大挫之二酋奔浚翼斬以獻聽款連山崖州黎亂勒將士討定之殲渠魁而止新會盜陳文伯剽掠四出光昇會兩副使討之諸將獲一緋袍賊尸衆目爲文伯將上功光昇引狄青討儂智高事止之遂中輟其不欺如此陞四川右布政使進左副都御史巡撫其

地光昇官蜀久洞悉利病乃重編全省徭籍吏無得以意高下核秋糧餘米爲勢家詭匿者抵免丁糧物料之派遂著爲令蠲鹺司閏課甦商民困又奏停取丹砂免採麩金勻停水陸郵傳歲省民財數十萬會建三殿需大木四川加派至一萬六千苦偏重且木必至土官番夷地乃得光昇計郡邑大小道里遠近爲程量轉借灌輸不加賦而官給帝獎其勞時嘉靖三十六年也越三年陞兵部侍郎兼右僉都御史總督湖廣川貴軍務屬苗人煽亂光昇選將俞大猷石邦憲安大朝等屬以兵事諸酋聞風瓦解遂宣布恩信而誅滅其負險怙亂者撫降二十八砦招回流徙六百戶鎮算有警薦大猷爲參將卒平之召爲工部

永春縣志

卷十八中

列傳中

三

侍郎提督大石窩尋擢南京戶部尙書時嚴嵩秉國政以賄成督撫無能徒手保位者光昇絕不與私交嵩亦採輿論用之以督木撫苗他人不能辦也而徐階又從旁推轂故光昇得發抒南京各衛軍饟以改折解北積減成乏釀激軍變光昇請復原額覆議續派軍始無譁又論筦庫主事黃鶚罷之四十一年自南京召入爲刑部尙書適戶部主事海瑞上疏攻帝失帝怒甚逮繫瑞光昇擬子罵父律以進尋帝崩瑞得釋方帝疾時怒至不可忍擬輕辟抵激之瑞必無幸故稍徇帝意俾就長繫光昇之達權濟變多此類也嘗疏陳五事曰嚴誣告權輕重詳訟詞懲奸慝省佐證帝嘉納之給事中沈束以建言繫詔獄十六年

通政司胡朝臣以非罪坐事論戍光昇爲申請俱得解一時善類深倚重之與徐階等隆慶初請老歸四年復召爲南京刑部尙書疏辭弗許高拱嫉私人劾之乃罷還光昇起家縣令至尙書引大體達事情居鄉嚴重謙退官司造謁非公事不齒及先世田廬無所增柘學主朱子重實踐所著書甚多年八十一卒贈太子少保謚恭肅子喬棟喬植 喬棟字以藩性至孝父或怒終夕跪寢榻旁俟父命乃起以廕授南京中府都事歷臨安知府父老喬棟辭官歸養貧弗自給光昇喜曰真吾子也其子暉事喬棟亦以孝稱 喬植字以培嘉靖甲子舉人喬植子炎字瑩甫萬曆戊戌進士知南海縣有祖風母憂服闋令餘姚牟

永春縣志

卷十八中

列傳中

四

山湖爲通邑水利豪家旁侵壅爲田請濬除之擢南京戶部主事黃氏自光昇貴後徙居府城故省志稱之爲晉江人

參省志及明史

本傳著述細目別載藝文此從略

顏廷榘字範卿慕仁里人父溥由太學生授連州別駕民愛之稱爲顏佛擢曲周知縣致仕歸偕姪廷榮捐地爲學田卒崇祀鄉賢祠廷榘嘉靖間由歲貢授九江通判耽風雅公暇攜客賦詩時時探匡廬彭蠡諸勝人以白居易比之屢承檄視郡縣事無不立辦會兵與民鬩當道欲罪民以媚兵廷榘執不可三上三駁廷榘堅持之忤上官意竟左調大寧都司斷事挾一蒼頭往居五年日以文翰自娛遷岷府長史輔導匡正王甚重之久

之告歸年七十餘縱遊薊燕吳越間所過洞天福地輒留詩紀勝海內名碩士多與投契年九十三卒與父溥並祀鄉賢廷槩重孝弟篤倫紀既與母弟廷棊中分產父晚再舉子廷槩再跪致產券母李食梅病酸終身不忍食梅爲諸生時師莆田人吳石渠後客死永春廷槩舁尸入門斂之爲位哭數日厚賻以歸自號陋巷生又曰贅翁曰桃源漁人永人稱之曰桃陵先生其墨蹟至今寶之所居魁星山下有泉廷槩生而竭卒前三日忽湧出人咸異之同邑黃澄萬曆間歲貢文學與廷槩齊名爲邯鄲知縣政績亦著其名輩視廷槩稍前而同祀鄉賢者有鄭莊彥陳嘉謨

永春縣志

卷十八中

列傳中

五

鄭莊彥字肅夫慕仁里人以選貢卒業南雍舉嘉靖甲午應天鄉闈授昌化縣教諭時士鮮知學莊彥勤於啓迪捐俸助修文廟督學林雲同嘉其志益延致五羊書院聚郡邑秀者使教之一時名士多出其門遷蘇州教授未幾遷國子助教遽以疾卒平居恂恂謹守無私謁祖業盡推與諸弟有友人客死海南家貧子女質於人莊彥贖而撫之時稱其義

陳嘉謨字思復迎福里人嘉靖十三年貢入京師廷試孔子正禮樂論引據經傳殆三千言閣臣霍韜奇之拔置第一超授道州學正歷補均州學正遷國子監學錄不就時年甫四十八嘉謨敦節行崇廉讓爲學正時捐俸賑饑修學宮所至有聲居鄉

值倭寇俶擾偕邑紳蔡鍾劉龍督率鄉民練兵禦寇其子克就以智略推爲本都義總犄角防戰功績甚著太僕李開芳嘉其行義稱之爲隱君子

蔡鍾字魁省昭善里人以歲貢授新會教諭遷陽城教授歷擢益府長史致仕歸與修邑志會倭寇入永糾衆捍禦民賴以安孫秉柱官至蒼溪知縣

劉龍字邦濟居留灣與蔡鍾爲同里人以歲貢授江西石城訓導遷浙江諸暨所至集諸生講學會文程課整然致仕歸寓惠明寺教導諸生士人奉爲模範嘉靖中羣盜蜂起龍與鍾等倡議團練捐貲濟饗遠近響應龍以姪君盟爲義長統帥民兵屢永春縣志

卷十八中

列傳中

六

挫賊鋒寇甚憚之其本末具大事志

劉應望字思儼桃源里人弱冠讀書靈山佛寺中每雞鳴而起危坐朗誦聲徹巖谷村民化之操作時間視以爲候嘗歎曰苟應望獲第靈山其富乎已而果然登隆慶戊辰進士知吳縣治最巡撫海瑞薦之與清廉宴應望首席時織造中官倨甚應望獨平待之具賓主禮而已鄰邑舉人趙用賢以冤誣繫獄應望辨出之用賢卒爲名臣遷池州府同知入爲刑部郎中以忤當事謫判大名府旋量移寶慶會申時行秉政薦其廉能擢知廣州府廣故瀕海多豪猾應望發奸摘伏郡稱神明值閩饑兩臺議閉糴應望力請勿閉格於議遂投檄歸隨行惟圖書數卷山

人黃克晦作琴鶴自隨圖以贈參省志及遺聞補其同時並有治聲而名位亞於應望者有翁有恒王天策周盛典李重華呂繹鄭純斌

翁有恒字以貞桃源里人隆慶中貢生除長泰訓導遷惠州府河源教諭知縣用私憾擠主簿監司行縣問有恒有恒曰公問諸生肄業當舉以對問簿罪非所知也監司怒曰謂監司無法耶有恒曰學官不當爲簿受法惟母老不去自恥耳遂自劾求罷監司大悔轉薦之兩臺使署長樂又移署長寧尋乞養母歸

舊志無傳據省志良吏傳補

王天策字國獻常安里人隆鄭庚午舉人授策州學正遷都昌

永春縣志

卷十八中

列傳中

七

知縣時邑苦虛糧東西鄉訟於闕庭天策奉詔履畝清豁之有豪匿鄱陽田數千畝以法繩治所豁逋累米三千餘石又清宗室詭糧九百餘石除賊丁四千餘口決獄出冤不嫌怨坐左遷乞歸天策樸而不斲直而不倨李廷機最信友之弟天範字國化以歲貢授潮陽訓導亦以能其職稱

周盛典字恒正

舊志作禎

迎福里人天啓丁卯歲貢

省志作萬曆

知和平

縣九連寇屢撫屢叛盛典至則綏農課士剔弊除蠹遂設奇誘禽其渠陳萬鍾靈秀誅之邑賴以寧以功加知府俸時議沒入賊田盛典單騎履畝歎曰有田者非賊爲賊者無田是殘喘餘黎賴以生者向沒於賊今復沒於官可乎力持之得寢然竟坐

是失當道意免官歸士民思其惠政立祠祀之子鳴鹿舉人
李重華字邦采 里人萬曆間歲貢生任連江教諭明經學
勵士行考績最陞弋陽府教授調署香山知縣興利革弊邑故
有澳稅在正課外歷任沿以爲利華除之吏持不可華曰受則
爲例不受則此例永革矣歸民戴其德爲立祠

呂繹字成可昇平里人篤孝能文萬曆間以貢選蕭灘丞攝三
縣事尋判常德歷視武陵縣事皆有政聲擢黃平知州卒於官
子兆熊推官

鄭純斌字景中 里人嘉靖間由歲貢授奉化教諭遷知縣
召爲王府紀善歷有政績

永春縣志

卷十八中

列傳中

八

李開芳字伯東和平里人

舊志亦稱太平

世以懿行聞鄉邑祖陽初幼

孤事繼母至孝歿哭之傷肺病疇終身嘗築陂以資鄰里灌漑
贖族人一鬻子爲之婚娶比陽初卒所贖子服之如所生父應
元萬曆中貢生親老無意仕宦一詣太學不數月遽歸鄉人有
爲吏部郎者強留之不可人稱其孝開芳登萬曆癸未進士授
戶部主事歷遷至江西按察使時中使入江西督礦稅首及廣
信其爪牙橫甚上饒知縣李鴻捕數人杖斃之中使怒露章疾
馳撫臣慮波及將繼劾開芳曰果爾海內視公爲何如人請劾
某而置上饒撫臣慚而止開芳爲人警敏論事發抒極底裏久
之遷廣西布政使擢南京太僕寺卿敦仕歸永春舊有永寧衛

屯田例輸本色民病之開芳與弟開藻力請於官得免自是福州興泉諸衛屯田皆改輸折色軍民德之 開藻字叔鉉省志作叔

元開芳從弟也九歲能屬文學於開芳弱冠同舉進士同授戶

部主事遣權滸墅關每歲冬十日開關恣出入商民便之治漕淮上弛禁行賑嘗於漕船中獲邪教叛民以獻奉旨褒諭又按浙江鹽屯有功擢雲南提學使遷山西按察司僉事仍兼領學政署其堂曰天下事私難而公易曲難而直易吾爲其易者而已有御史父嘗官山西求祀名宦開藻判其牘曰雖有褒逝之舉豈無諛生之嫌與御史大忤拂衣歸再起山東四川提學歷江西提學副使告歸開藻在仕途清聲著聞然不樂進取實以

永春縣志

卷十八中

列傳中

九

養父之故父歿哀毀逾禮服闋起江西提學南京尙寶司卿俱不赴再起太常少卿未就道病卒開芳開藻致仕後皆好爲德於鄉暇則父子兄弟日以詩章唱和相娛樂縉紳間侈爲盛事其歿也開藻祀鄉賢而遺開芳論者以爲闕典開芳母弟開芬及季子曾琳俱以行誼稱 開芬字仲熙萬曆間舉人授翰林院待詔侍父應元孜孜色養終身不履仕途 曾琳字仲溫少孤事母兄以孝聞崇禎間副榜廷對稱旨不就銓而歸參省志 莊際昌字景說宋少師夏後也曾祖用賓夢張岳投刺相謁而際昌生因名夢岳後改今名莊氏世居晉江際昌始復籍舉萬曆己未進士會試殿試皆第一終明世閩人兩得第一者惟際

昌而已制策偶訛一字爲忌者所糾遂假歸

楊漣集有劾史繼階疏言際昌制策

事天啓初補授翰林院修撰召修國史充經筵展書起居注編輯六曹章奏奉使冊封趙藩王厚餽之皆不受乙丑分校禮闈頒題稍遲主試令人登屋傳呼外簾官際昌持不可曰內外之防祖制也此防潰蔑不潰矣時魏忠賢勢方熾當事者多其所私際昌侃侃力爭同試目攝之不顧也編修陳子壯忤忠賢削籍命甫下偵者盈門際昌馳慰勞或言禍且至怡然曰苟得藉此去吾願也撰誥勅忠賢兩爲所私請不應深銜之值修三朝要典際昌非之曰是欲以國史爲刑書乎適敘遷宮僚遂假中旨奪其職際昌歸怡然爲終老計跌宕閩南山水間自營壙於

永春縣志

卷十八中

列傳中

十

青陽山麓題曰羹元真息鐫詩其旁曰百年忙半逝四大本歸虛不復問朝事矣莊烈帝卽位誅魏闖盡斥其黨卽家起際昌原官歷遷右諭德進左庶子兼侍讀漏盡入侍率二鼓方罷竟以勞卒年五十有二贈詹事際昌爲詩文泚筆立就嘗登武夷選幽探奇一峯輒占一絕歷五嶺陟八桂星巖霞洞諸勝題詠殆徧家居肅飭不問戶外事獨好爲德於鄉海寇不靖際昌約鄉黨編伍守望宵柝相聞濱海以安溜石故有陡門南鄉數都之水賴以蓄洩又新溪岸障鹹水受淡水潮汐乘之久圯際昌修築之以受水處狹爲廣設三閘捐資鳩工歲方旱工成四十二鄉咸賴焉喜引掖後進以文謁者稍挺異必爲延譽學者咸

歸重之子希范字藻先崇禎初恩貢生際昌卒邸中希范扶櫬南歸渡河颺將覆舟焚香禱風立息抵里母病目翳以舌舐之數月愈母病顛天減算益母齡母竟瘳值寇擾周卹戚族鄉黨稱之孫延裕康熙朝進士參省志補初莊之先世有屠者以母嗜豬肝不能常供乃業屠日以肝奉母有術者爲人相地得吉夜夢神告此莊屠地妄許人殃將及汝懼以名物色久之無所遇客湖洋偶自市肉得之乃屠者也怪而伺察之稔其孝乃以地告卽錦繡也初名鬼岫寧宗寵異夏錫今名莊氏自此日熾世有達者至今猶爲泉望族

郭紹汾字鼎山善化里之福鼎村人嘉靖間以歲貢授合浦訓

永春縣志

卷十八中

列傳中

十一

導署縣令又署廉州教授所至有聲巡按陳瑞山行文獎勵巡撫張岳深器重之紹汾通易學居喪革火葬之習鄉人化焉子興俊死倭寇之難見忠義傳

永春縣志卷十八下

列傳_下

清

顏堯揆字孔敘廷榘孫也順治間由拔貢生知邵陽縣考最遷保安知州歷任無爲州太倉州所至均有政績其任無爲也前知州修國貞築壩爲江濤所齧工多圯壞堯揆至重修築之度自李家祠至王家渡計延斜八百八十丈廣三丈高一丈九尺規模恢偉而工作堅凝有加於前由是每遇大水田廬均得無恙州人懷其惠勒石壩上名其隄爲顏公隄後竟以罣誤歸宦橐蕭然堯揆性溫良坦率無城府工書喜吟詠有祖風所著有永春縣志

卷十八下

列傳_下

一

梅廬北遊西秦燕山楚遊塞上等草今多散佚子鏞康熙間拔貢篤志力學絕跡公門所著有蛙吟集孫天祐天注皆庠生以讀書世其家諸羣從夢孩奇宿皆知名顏夢孩字孔真家素貧以授徒爲業勤於誘掖邑中人士多出其門順治間由歲貢入北雍舉順天丁酉鄉闈考選知縣請改教職授福清教縣以明經勵行率士學者咸宗仰之爲人和易與物無競卒年八十有三

顏奇宿字應侯康熙初由舉人知平遠縣創義學修邑志省徭薄賦歲飢賑貸全活甚衆有武弁恃勢焚鄰居汙人女奇宿立擒之寘於法民甚愛之告歸琴書外無長物老年嗜學凡四應

賓筵壽至八十五卒道光間編修陳壽祺以宿學纂福建省志紀述清代良吏永春惟堯揆奇宿二人

劉陶祈字懋黃

里人順治間由貢生知鄞縣時山海未靖

邑大政繁軍務填委陶圻以忠信爲上下所悅服令行禁止百姓案堵修學造士尤具衡鑒凡所甄拔多登甲科掛冠歸鄞人立碑頌之自二顏陶祈後邑人之通籍爲縣者若王廷聘劉海嶽周永鄭夢馨王繼美尤錫觀皆以稱職名康雍間

王廷聘字莘孺常安里人性穎悟十五歲方就傅六載學成舉康熙己酉鄉闈初除井研縣招徠流民安集得所時適有增賦之議廷聘力請薄征民德之丁卯分校四川鄉闈稱得人劉鳳

永春縣志

卷十八下

列傳下

二

翥陳御簡傅聖泉等出其門後皆通顯旋擢大興縣勳戚家著籍者抗賦不納歷任官吏不敢過問廷聘患之謀於大學士李光地及見義侯林興珠建白於朝將重懲之由是治內無敢逋者宿弊一清政聲大著旋以軍功進階光祿大夫贈及三世終東城兵馬司指揮壽八十九廷聘故廉吏然宦達久家累巨萬劉海嶽字鼎華里人康熙間由舉人授高陵縣陳鹽政革火耗歲省三千餘金民咸便之以母老乞歸高陵爲立石頌德周永字祈聲迎福里人父宗濂康熙間由舉人授知縣改教職歷南平漳州以壽終永承家學繼登鄉榜選授來賓知縣歷調陸川西林政簡而民安之西林舊有催收派累及供應諸陋規

永至詳憲革除勒石以記民歌頌之卒於官

鄭夢馨字振清儒林里人小名一老弱冠舉於鄉故時有老後生之諺授廣西武宣縣未之官丁內艱服闋補授咸寧在職五年備著惠愛邑每旱潦祈禱立應人以爲積誠所感也後補盱眙三閱月積案盡清改旌德爲前任力白冤誣罣誤歸布衣敝履吟嘯自娛人服其清

王繼美字孫采 里人癸巳與夢馨同舉鄉闈授棗陽知縣性木強而吏事精敏人不能欺丁祭舊有派辦繼美曰祭聖盛典可藉以爲苛政乎出示永禁同城官相黨援按法劾去之後忤上官意被劾者從旁搆之遂掛彈章卸事歸蓋涖官甫八閱

永春縣志

卷十八下

列傳下

三

月云

尤錫觀字伯賓昇平里之蓬壺村人從祖鵬翔康熙間由舉人知長寧縣文采風流有東粵仙吏之譽祖鳳翔父元會號儀軒尤氏自鳳翔鵬翔兄弟敦倫尙義至元會益以樂善好施著家鉅富元會積而能散邑中道路橋梁工程偉鉅者多其所修建也羣從間元愈元學亦敏練疏財能濟其美雍正四年大饑元會賑粟二千餘石全活無算總督高其倬重之爲旌其閭錫觀由附貢生授順昌司訓擢山東昭遠縣旋調在平自捐廉俸以賑貧民管氏趙牛古河久塞不理錫觀疏請濬之由是旱潦有備墾荒地置義田立社倉興義學並建育嬰堂遂生堂凡有利

於民者皆盡心力爲之制府上其績題授臨清知州以憂歸居鄉與弟錫蘭興利除弊加惠桑梓州牧杜公昌丁甚敬重之勒石於通仙橋側紀其行事子廷模副榜任尤溪教諭錫蘭子昌炯舉人歷任訓導京師舊無會館宦學往來者皆寄寓泉州會館錫觀始購地於宣武門外之琉璃廠南築之歷有修拓今尙存故永人言富者並稱王尤而樹惠鄉閭歌誦不衰者元會與錫觀父子也錫觀別號省園故杜昌丁碑文云

林興珠字而樑昇平里人叔父日勝本業屠順治初聚衆數千據馬跳帽頂諸砦以應明遺臣鄭成功成功表授日勝伯爵令統率永德間諸砦以牽綴清人內地之兵十三年夏爲安溪李

永春縣志

卷十八下

列傳下

四

日燦所敗乃率其衆投誠興珠與焉授福寧總兵尋左遷副將調辰州屢立奇功爲忌者所擯不得敘興珠鬱鬱吳三桂聞其名調之入滇重用之以故興珠附於三桂康熙十二年三桂舉兵反全有長江以南諸地以興珠生長海濱遣將水師扼岳州洞庭諸要害以禦安親王岳樂及諸將韓如琦等軍令不得渡興珠度三桂終無成韓氏客蔡鵬素倜儻習知興珠能言於韓貽書爲言逆順禍福更身入其營說之興珠大悅舉軍降獻策攻君山水砦下之捷聞聖祖召至京授建義將軍封建義侯

舊志

作見義據皇朝通考改

從平雲貴授鑾儀衛鑾儀使著籍鑲黃旗初俄羅

斯邊將在西伯利亞者築城於黑龍江外之雅克薩擾我索倫

達呼爾諸地邊吏禁之不聽二十四年夏聖祖命都統彭春督軍往征興珠及左都督何祐將福建籐牌兵五百佐之水陸並進抵城敵人迎擊槍彈雨下興珠令挽牌者入水而伏聲止乘流復進敵彈不能中皆驚曰此大帽軍也遂潰興珠乘勝攻克之虜其將額里克舍等毀其城而還三十五年準噶爾噶爾丹汗復掠蒙古聖祖自將討之興珠復以籐牌兵扈駕從征至克魯倫河與敵遇突其駱駝陣大敗之於烏闌布通還先是興珠以征雅克薩功官其子三人旋以事落職至是以功復原官久之卒興珠起草澤驍捷善戰多權略然頗輕肆不檢故事將兵惟親王貝勒有大勳者得用姬媵從行興珠髡女子冒爲僧自

永春縣志

卷十八下

列傳下

五

隨或聞之聖祖聖祖曰彼老將非婦人莫適也其優容功臣宿將如此劉獻廷廣陽雜記云

以上參章夏時紀事及武功紀盛
蔡鵬傳及□□筆記補○興珠原

名興朱歸清
後改今名

黃龍字見侯和平里人少負奇當山海未靖投筆從戎隨總兵陳龍大破江機楊一豹於光澤征明遺藩朱統錫有功撫臣吳興祚壯其才武拔置麾下從復永春德化解泉州圍敗鄭經將劉國軒於江東橋克金廈二門取南日海壇諸島所向有功任海州遊擊轉太平府參將晉虎頭門副將特授南澳總兵官賜聖藥蟒袍鞍馬弓矢原品致仕誥授榮祿大夫龍性仁慈不輕殺戮每得賊所掠男女悉資之歸嘗巡海夜遇風舟幾覆忽黑

影中得火光引入小港遂以無恙訪他舟多漂泊乃葬溺者並恤其家澳人立生祠祀之晚愛仙遊風土之勝遂居焉子文暉以父廕由附貢授治中歷工部員外郎戶部郎中知泗城思恩太平等府治事勤慎擢雁門兵備道復入爲工部郎中卒

黃英字爲高安仁里之泮溪村人少孤苦養於吳徙興化遂以吳爲氏而籍莆田康熙二年以平金廈功授都司甲寅耿精忠叛附于吳三桂時英爲浙提左軍游擊會寧海將軍喇哈達視師問諸將誰可膺大任者提督首以英對遂擢福建督標中營副將授爲先鋒前後克復黃巖太平樂清青田象山等縣解處州圍破逆黨曾養性於温州殲海寇張拱垣朱飛熊於毛頭洋

永春縣志

卷十八下

列傳下

六

復收捕遂昌松陽等山寇水陸數十戰皆親冒矢石身先士卒定謀制勝每獻捷功居首擢副戎任閩制府中軍時鄭經將劉國軒何祐等屢攻略漳泉鋒銳甚英數出奇兵與戰於陳三壩觀音山江東橋所向披靡擢同安總兵隨率舟師復平金廈是歲列郡大飢英馳請總督姚啓聖出示許沿海百姓出界採捕全活百萬尋移鎮興化適提督施琅疏平澎臺以英統陸師爲副誓衆登舟先取八罩嶼選精銳焚賊巨艦奮勇直前立克澎湖及臺灣平凱旋入覲奉溫旨褒嘉賜鞍馬衣袍調浙江舟山總兵甫閱月擢四川提督在蜀十一年以閩海巖疆改授福建陸路提督未幾復調水師殫心經畫凡關國計民生者無不悉

力舉行後以年老乞休賜御書匾額加威略將軍尋賜詩存問
年七十六卒贈太子少保其誥勅今尙存泲溪家中其族裔弈
修嘗爲人言之會修志徵黃氏世譜及誥勅驗之信始知英本

永人黃氏子也

省志但言其先泉州人而遺縣邑及本生

鄭廷瑾字永懷號誠菴其先世避元季寇亂徙安溪常樂里之
御屏

一名呂坪

遂著籍焉至廷瑾始復籍少篤學善屬文登康熙丙

子鄉榜授東阿知縣居九載多善政嘗再署東平州時西征未
息封疆大吏應詔委所屬守令轉餉塞外多畏縮規免者廷瑾
獨毅然請行大吏壯而遣之乃逾長城歷沙漠往還萬餘里面
目黧黑前後幾若兩人僚屬相慰勞廷瑾曰丈夫以身許國死
永春縣志

卷十八下

列傳下

七

生以之何瀚海冰天之足畏哉後以軍功加秩廕一子入監讀
書旋膺行取未幾以勞卒於官其後裔多能守儒業者遺文簡
古矜貴不務華藻李光地之化也

王謙益字受子慕仁里之石鼓村人少有異慧諸史百家無不
貫涉髫年入泮乾隆戊辰第進士授山東樂陵縣潔己奉公平
獄息訟嘗奉檄濬馬頰鬲津二河按畝出夫以均力役無漏富
役貧諸弊在任修邑志建義學立九賢祠又重修許忠節公逵
廟所興作皆有關風教久之以憂歸樂陵人思其治績卽祔其
像於許公祠所著有槐音堂等集初乾隆戊午邑中與謙益同
舉於鄉者三人鄭成中黃際培魏大任惟成中最知名

鄭成中字振龍居儒林之董埔學問淹博以文章名泉永間由舉人選授山西太谷縣尋改建安教諭所至有聲家有薄產悉讓弟卒於官其名輩先於成中而由縣改教並有績業可稱者有蔣起奎顏斯謀 起奎字聚公康熙間由知縣改永安教諭課諸生先品行而後文藝子應春歲貢生亦歷任訓導 斯謀字繩燕康熙間選四川冕寧縣改浦城教諭篤學醇謹諸生愛之秩滿貧不能歸浦士共餽之贖乃得還

邱景雲字彩倬儒林里人父元學字儼齋質厚有幹略州牧杜昌丁建衛城壩命元學董其役景雲少好學至老不倦自六經左國莊騷暨唐宋八家文皆成誦爲人坦直遇公事力辯是非

永春縣志

卷十八下

列傳下

八

由廩生舉乾隆甲子鄉薦入都大學士蔡新延之課其子孫同寓西苑直廬凡十餘年癸巳授河南密縣新文廟及卓茂舊祠以崇風教構瑞春書院以課士修河梁以便行旅勤恤民隱案少留牘在任二年歸老林泉惟以教督子孫及生徒爲事年七十四卒子人龍人鳳人騏人驥俱有行業 人龍字宏蒼紀昀筆記中所稱二田孝廉者也善詩文工翰墨由拔貢入都考選中書館滿授州同不赴甲午與弟人騏同舉於鄉御史李玉鳴被遣人龍以師生禮送之數百里護其家屬歸籍人多其義後以會試卒獻縣旅邸中 人鳳字宏儀庠生三十九年以運饒金川功授司獄守正不阿秩滿歸 人騏

邱氏譜作騏今兩存之

字宏海

與兄同遊庠又同舉鄉闈遂於經易書春秋均有訓釋 人驥
增廣生鄭一崧重修州志人驥與兄人麒並任采訪

顏璫字突山慕仁里之社山人篤學爲文制舉業淵粹有先正
風乾隆癸未成進士知涇縣有風力抑強扶弱折獄明慎無能
干以私者涇人畏而懷之乙未江南大飢大吏檄屬運賑溼米
先至大吏嘉之大計稱璫爲人謹飭辦事實心鄉闈分校所得
多知名士歸掌教清源書院居家喪祭遵家禮輯家譜訂族規
纂州志皆有建白不肯苟同卒年七十八所著傳信集多根極
義理關繫風教今存子墀簡歲貢生曾孫龍光訓導 龍光字
松齡咸豐初寇陷州城旋即克復龍光所部鄉兵與有力焉知

永春縣志

卷十八下

列傳下

九

州吳請大吏咨部給獎生平見義勇爲綽有祖風子慶嵩教授
慶雲廩生

周青雲字鼎聲迎福里之前溪人乾隆辛未成進士授四川大
寧知縣務農興學多所勸建鑿黑石門洞二灘以便舟楫開紅
崖坡及馬鎮以利行旅民咸德之丙戌迄癸巳兩修巫山大寧
城三辦緬甸金川軍務皆規措有方事舉而民不擾以老請近
改福寧府教授青雲質魯力學文辭典雅人多傳誦經指授者
多所成就年七十卒於官家無餘財有裔孫光武者少賈上游
值粵寇入閩爲所掠事李秀成頗見任金陵平得歸言太平事
甚悉有叩其先祖軼事者尙言之厯厯也周姓所居前溪卽唐

昭州刺史盛均故里自永及青雲筮仕後鳳翔自超聯登相繼擢科第歷宦有聲遂繼盛而爲縣望族

周鳳翔字振儀資稟聰敏爲制舉文才氣橫溢成進士任浙江清吏司主事遷江蘇清吏司恪共效職暇卽讀書稽古兼通掌故撰著甚多卒年僅四十餘省議員壽恩其後也

黃河光字雨樓始安里人乾隆間由舉人知樂亭縣治事明決民稱爲黃青天河光廉正不阿愛民如子初署理期滿受代樂亭民頂祝冀其復來數年復至民喜出望外謳歌載道遷甘肅寧遠縣政聲如前卒於任百姓爲出運資闔縣送之有送至其家者其得民心如此歲貢生振宗其孫也

永春縣志

卷十八下

列傳下

十

孫士瀾字海若儒林里人工書能屬文屢試不售適林姓兄弟同捷武闈父豔稱之士瀾徐對曰兒以讀萬卷書持三寸毫以致遠顯親爲難耳若策肥挽強與健兒角勝矢石間兒雖才弱固未遽落人後也父奇之因令習武士瀾狀魁偉膂力過人夜燃香百步外注矢射之無虛發衆驚爲神康熙戊辰第武進士授溫州鎮標遊擊在任兵不妨農民無憂盜暇卽讀書作字嘗曰將不知書必非名將識者躉之轉寧波參將致仕歸子元師諸生元溫武舉其並以儒業改武致通顯者士瀾之後同邑中有周自超

周自超字偉齋聰穎博學能詩文工楷法章草尤超逸有致童

試列前茅不售以勇力過人並與武場遂入穀鄉會試皆列高等乾隆癸丑以一甲三名及第授侍衛從駕熱河獲刺客以功賜獨眼花翎賞穿黃馬褂異數也

或云仁宗即位後念前勞賜之

嘉慶初蔡牽

擾沿海朝命孫全謀等會師廈門討之以自超將水師中營自超知兵善射諳寇情與士卒同甘苦所部無不用命者屢與賊戰破之以功移鎮金門壬戌八月與賊戰高漲殺賊將辛德成等三十餘人賊遁去以漁舟奮追至銅山宮口得賊尸戮之署海門總兵官兼筦平海時會黨陳阿本謀以平海應蔡牽招衛中無賴及各營弁多人謀舉事自超廉得其狀及巢穴所在乘雨夜率所部輕銳掩其不備覆之誅渠魁卓亞旺等數十人而

永春縣志

卷十八下

列傳下

十一

撫其民無所株累平海民德之立祠以報旋獲黃阿武等百餘人於黃嶼擒陳明練於莽洲復追蔡牽於龍門鎮敗之禽其黨三十餘捷聞遷崖州參將歷香山水陸協鎮保擢虎門總兵官無何以新會黃象新礮臺失守當事坐自超疎防革職留緝十二年六月復率所部會錢許孫諸將追蔡牽於桅夾門深入爲賊伏舟所圍衆大潰自超負重傷見事急乃裹創率勵所部死戰突圍發大礮沈賊船二引弓射賊酋三人皆應弦賊稍懈諸將因之得潰圍出事聞復原職自超與賊角十數年前後屢立功然風潮不常賊蹤飄忽而諸將良楛不齊事權不一自超常坐累自感數奇乃告病乞歸卜居於虎溪山坳齋舍僅數椽題

其額曰環谷草堂日以賦詩彈琴自娛幅巾藜杖蕭然如寒士足跡鮮至城市課子孫讀書作字並藝田圃自給以宦途爲戒絕口不談戰功久之卒子世奇孫景梯曾孫家瑞皆諸生世奇子景鸞業儒授徒於經藝之外每課詩歌少暇兼務耕耘不以胼胝爲苦自超之教也

據行狀
參遺聞

謝恩詔字紫齋 里人由行伍出身洊陞安平副將嘉慶十四年與總兵孫大剛參將陳登遊擊陳寶貴等率舟師從水師提督王得祿邱良功大敗海賊蔡牽於魚山外洋追至黑水深洋滅之敘功擢江南蘇松總兵復調浙江黃巖兩權提督所至飭營制簡士卒廉以持己嚴以御衆軍政肅然任水師數十年

永春縣志

卷十八下

列傳下

十二

精駕駛攻戰之法輯有舟師繩墨一編年七十四卒於任

舊志
無據

省志本傳
參外紀

鄭炯字朗山儒林里人性醇厚力學善屬文謹嚴閱肆兼而有之乾隆己酉舉本省鄉闈第一歷任慈利羅源新化平江龍山沅江瀏陽等縣所至俱以廉謹稱以老請近歸裝僅百餘金及書數種而已德化鄭兼才爲時名儒嘗稱炯器量爲吾屬第一人

人以書勸改任南靖教諭久之卒弟煊嘉慶癸酉舉人初隨兄之任善贊襄爲時賢所重晚任安溪教諭亦有聲

周聯登字春臺讀書務爲根柢之學家屢空晏如也嘉慶庚申舉於鄉歷知閩鄉登封洛陽光州光山柘城留心民瘼教養兼

施所至有聲初任閩鄉值旱災奏請蠲緩漕糧給予撫賑報可
遷登封嚴禁包買市穀以平米價復設粥廠以收養貧民尋調
光山值寇警嚴保甲練壯勇清野據隘寇知有備竟不犯奏最
遷洛陽復署知光州勤政勸學風教大洽久之任柘城在治六
年益發舒通溝濬河糞壤棄者有禁教兼種紅薯一名番薯又名地瓜及
花生由是盡地之利白壤皆爲黑壤歲鮮歉豐則收入加倍又
特嚴賭博酗酒游惰之禁鼠竊及健訟者發覺皆重懲之訂保
甲立學校刊聖諭廣訓附以通俗口義頒各鄉塾令不時宣講
以革弊俗柘城故多訟至是不變焉聯登所履境內禾麥雙歧
及草木偶異人士多歸美作頌張之以良吏政教所感也其得

永春縣志

卷十八下

列傳下

十三

時譽如此聯登工制舉業博涉羣籍至老不倦道光初分校河
南鄉闈所薦多知名士歸掌教梅峯書院課士之暇錄其前後
在河南所設施者編年紀之爲存耕堂治譜築挹翠軒優游林
泉自娛久之卒子維新嘉徵孫華雯曾孫慶恩玄孫肅恭炯煌
俱諸生以儒業世其家 嘉徵聯登第八子晚得之產於汴故
字汴溪少聰警聯登最愛之未冠爲諸生恃才而蕩不數年逋
負累巨萬父怒言於知州王光鏜送之署擬重懲其子諸生鼎
雯時纔髫齡詩官請代酬對敏給光鏜異焉乃反覆開諭薄責
之令從其子歸自此折節改行更以幹略重州里間咸豐間林
俊倡亂寇蜂起嘉徵偕近治族鄰練團捍禦城邑賴之知州崔

洲上其勞得獎又與平謝險劉光居之亂保舉廣東縣丞前溪
陂因亂圮塞嘉徵偕兄子華雯重修治之里人至今享其利同
光間卒

李景沆初名國華字義楫別號惺齋昭善里人幼從叔父啓元
學咸豐辛亥舉於鄉歷知晉州滄州新樂鹽山南皮鹽山素無
考棚書院景沆捐俸倡設之政暇自課之學鹽山人士自此盛
郎中李桂林會元李聯珠皆其徒也景沆博雅而敏練所至有
聲致仕歸主講鵬山書院非公事未嘗干預地方利病長吏每
造訪焉嘗建懷古堂以存先賢遺蹟京師會館圯景沆通籍後
葺而新之其爲德鄉里如此年七十四卒弟國標歷任訓導國

永春縣志

卷十八下

列傳下

十四

士優廩生兄弟間互相師友子師瀚師迪師瀛皆知名 師瀚
字克仁任南安洪瀨都司時洪楊倡亂中原永春林俊應之所
在多伏莽師瀚微服偵治屢有破獲由是盜賊斂跡旋升陸路
後營副總兵移駐泉州 師迪字克厚任浙江遂昌縣典史勤
敏舉職嘗曰官雖小亦朝廷耳目慢吾事是慢朝廷也卽此言
可知其存心矣 師瀛字楚媚歷任蓬萊縣丞登州府通判遷
知福山及魚臺縣事初至任革除弊政豪宗強族有犯必痛懲
之每曰爲政莫先去暴去暴卽所以安良也以勞卒於任縣人
爲立石頌德景沆兄子因時 因時字雲亭立品端方遠勢利
文亦雅淡如其人初隨叔景沆之任嘗屢應順天鄉試不售回

籍舉光緒己卯鄉闈年已七十矣知州袁學顯重其名行延主
鵬山梅峯兩書院課士有方州人稱之兄盛時字雲濤與弟齊
名晚年賜副榜貢生兄弟俱享大年兄子則友逢辰俱庠生因
時能詩所作見無錫丁君福保近代詩選中